



Siaran **AKHBAR**

KEMENTERIAN PERTAHANAN MALAYSIA

MOD.100/2/1/2 JLD 5 () 02/05

**JASA DAN PENGORBANAN SERAMAI 416 VETERAN ANGKATAN TENTERA
MALAYSIA (ATM) DIKTIRAF MENERUSI PENGANUGERAHAN PINGAT JASA
MALAYSIA (PJM) OLEH TIMBALAN MENTERI PERTAHANAN**

7 Mei 2023 - Yang Berhormat Adly bin Zahari, Timbalan Menteri Pertahanan telah menyempurnakan Majlis Penganugerahan PJM kepada 416 orang veteran ATM, balu serta wakil waris di Grand Ballroom, Melaka International Trade Centre (MITC), Ayer Keroh, Melaka.

Majlis penganugerahan PJM telah dikoordinasikan oleh Jabatan Hal Ehwal Veteran (JHEV) ATM bermula pada 3 Mac 2004. Penganugerahan pingat ini merupakan pengiktirafan kepada anggota tentera di atas sifat keperwiraan, keberanian, pengorbanan dan kesetiaan mereka semasa berhadapan dengan ancaman pengganas komunis suatu ketika dahulu. Sehingga hari ini, seramai 37,494 warga Veteran ATM telah menerima PJM. Kejayaan bekas anggota tentera membentasi ancaman komunis selain memenuhi syarat-syarat yang telah ditetapkan seperti berikut telah melayakkan mereka dianugerahkan dengan PJM:

- a. Telah berkhidmat atau terlibat dalam operasi secara berterusan selama 3 bulan dan ke atas atau telah bertugas secara langsung tidak kurang dari 6 bulan di mana-mana pasukan atau formasi ATM bagi tempoh dari 1 Januari 1969 hingga 2 Disember 1989 bagi operasi menentang Parti Komunis Malaya (PKM) atau,
- b. Telah berkhidmat atau terlibat dalam operasi secara berterusan selama 3 bulan dan ke atas atau telah bertugas secara tidak langsung tidak kurang dari 6 bulan di mana-mana pasukan atau formasi ATM bagi tempoh 1 Januari 1969 hingga 17 Oktober 1990 bagi operasi menentang Parti Komunis Kalimantan Utara (PKKU) atau,
- c. Telah terbunuh, cedera atau menjadi kurang upaya disebabkan oleh tugas menentang pengganas Parti Komunis Malaya (PKM) bagi tempoh 1 Januari 1969 hingga 2 Disember 1989 atau pengganas Parti Komunis Kalimantan (PKKU) bagi tempoh 1 Januari 1969 hingga 17 Oktober 1990.

Timbalan Menteri Pertahanan mengucapkan setinggi-tinggi tahniah dan syabas kepada semua penerima PJM pada hari ini. Penganugerahan ini merupakan kurniaan atas sikap keperwiraan dan pengorbanan anggota tentera dalam melaksanakan kewajipan kepada negara. Sesuai dengan tarafnya sebagai "*campaign medal*" yang berlandaskan pengorbanan dan perjuangan yang tidak berbelah bahagi semasa darurat dahulu, PJM telah dimartabatkan sebagai pingat yang lebih kanan dalam susunannya berbanding dengan anugerah-anugerah yang sama kelas dengannya seperti Pingat Perkhidmatan Negara Bangsa-bangsa Bersatu (PNBB) dan Pingat Perkhidmatan Setia (PPS).

Pengurniaan PJM ini adalah refleksi terhadap suatu pengorbanan yang amat besar, yang diiktiraf oleh rakyat dan negara dalam menggalas tanggungjawab menjaga kedaulatan dan keselamatan negara dengan penuh taat setia. Masyarakat digesa menghargai jasa dan pengorbanan para pahlawan negara ini sehingga negara dapat mengecapi keamanan yang dinikmati pada hari ini. Beliau turut merakamkan setinggi-tinggi penghargaan dan ucapan terima kasih kepada pihak penganjur iaitu JHEV ATM kerana telah berjaya menganjurkan Majlis Penganugerahan PJM pada hari ini.

Turut hadir dalam Majlis Penganugerahan ini ialah Ketua Pengarah JHEV ATM, Mej Jen Zambery Jefry bin Haji Darus, Panglima 1 Briged, YBhg Brig Jen Mohamad Noorlizam bin Shamsuddin, Komander Rejimen Ke - 514 Askar Wataniah, YBhg Brigedier Jeneral Datuk Yusof bin Haji Jantan serta wakil-wakil Persatuan veteran Negeri Melaka.

Untuk sebarang pertanyaan, sila hubungi Pegawai Staf 2 Media (Udara), Unit Komunikasi Strategik, Mej Ezrie Hanif bin Yusof TUDM ditalian 017-25 404 77 atau Ketua Unit Komunikasi Korporat JHEV ATM, Kapt Mohammad Asyraf bin Mohd Ameran TUDM di talian 019-208 1023.

-TAMAT-

“MALAYSIA MADANI”

“BERKHIDMAT UNTUK NEGARA”

“PERTAHANAN NEGARA TANGGUNGJAWAB BERSAMA”

Kementerian Pertahanan Malaysia
7 Mei 2023

